

城池公署學校壇廟修建攷

朝邑志卷七

城池

縣城周四里高一丈五尺池深廣各一丈創建於明景泰二年知縣申閏繼成於成化二年知縣郭良十七年知縣李英嘉靖二十年知縣劉尙義厥後時圯時葺入國朝康熙十九年知縣陳昌言重修戊寅霖雨坡水大發東南北三面衝崩幾盡四十六年知縣王兆鰲重修乾隆十七年知縣成邦彥又修城門五東曰臨河順治十七年知縣丁魁南建樓其上改題曰陽稊像祀昭烈君臣西曰鎮羌建樓像祀真武曰金湯南曰望嶽康熙六年攝篆檢校劉聲芳建樓像祀文昌後圯四十五年署事西延督捕同知張芳及知縣王兆鰲重修北曰迎恩

公署

朝邑志卷七

縣治在城中央不知其所自起據李益志起金大定七年元大德七年知縣李英重修嗣是而宣德成化知縣一鼎與郭良相繼增飾本朝乾隆三十二年知縣楊嗣三十八年吳忠誥又修大門舊爲洞門上架譙樓建自知縣郭良形家病其土重不利於縣康熙五十年知縣王兆鰲改建三間儀門三間東西角門各一間大堂五間川堂五間三堂三間內署在三堂後庫房一間在大堂西東西房科各八間戒石亭在儀門內甬道今易以坊常平倉一十八間在大門內東偏舊制粗略覆板於地上置席囤儲貯多滯爛康熙五十年知縣王兆鰲修葺如倉廩式擴增完固獄一所在儀門內西偏舊獄卑隘歲久圯頽囚多苦之康熙五十年知縣王兆鰲捐俸修葺固潔俾得寧所馬廐一所在儀門內東偏

縣丞署在大堂西明萬曆十年丞裁署廢主簿署在水署西明天啟二年簿裁署亦廢本朝三十八年復設分駐大慶關典史署在馬廠東巡檢司稅課局舊在山西蒲州西門外自黃河西徙遷新大慶關陰陽學醫學在縣治西北藥王廟僧會司在饒益寺道會司在太白廟申明亭旌善亭寅賓館俱廢

察院在儒學南卽部使行臺有大門儀門大堂二堂內有庖湍外有候亭康熙二十三年知縣陳昌言修今南新倉基卽是布政分司在察院西南久圯兵備道在馬王廟東門亭堂皇如察院式康熙三十四年知縣楊又時修乾隆三十四年知縣楊衍嗣改建華原書院

楊衍嗣華原書院記曰古者國有學遂有序黨有庠家有塾自天子王公至於庶人莫不教之以窮理正心修己治人之

道豈故爲是繁文縟節強天下以所不能哉亦將因其人性之固有勉其職分之當爲而使當世之士明先王之道爲有用之才而已也我國家鼎興百二十餘年海內乂安振興文教詔直省建立書院廣育人才於是州邑郡縣莫不爭立學舍而朝邑舊有西河書院第規模湫隘不足爲諸生藏修之所余承乏是邑恒懼人才渙漫儒效疎濶無以仰副聖天子菁莪棫樸之意思所以廣之而署東故地厥址爽塏遂與邑之紳士捐貲鳩工建堂延置講齋以及棲士之舍無不備具工既竣廼顏之曰華原書院余方爲經其膏火酌其條教欲與二三子時相討論以樂觀其成而適奉檄西行然歐陽永叔有言教學之法本於人性磨揉遷革使趨於善惟善教者以不倦之意須遲久之功至於禮讓興而俗醇美然

後爲學之成况朝坂之區大河繞其東華原距其北山川孕毓之奇人文蔚起之盛尤所謂其教易入而其化易行者哉今其學甫立漸有成效惟後之君子毋廢毋慢而使茂草興嗟幸余他日者馳驅王事道經斯邑入其境將見人人譚禮樂事弦誦俗多仁厚之風戶鮮囂陵之習修之家足以明先王之道獻之廷足以爲有用之才庶不負余經營之初心而所厚望於朝人也夫故於其將去也泐詞於石而爲之記

又知縣吳忠誥記曰朝邑水秀山明瓌瑋絕特之士代出問所以琢磨而淬厲之則宰斯邑者責也前令玉臺楊君捐廉倡義始建華原書院甫就緒調任霸陵予自庚寅冬蒞事卯春苦旱募設粥廠三旬雨降麥大熟餘米變價得銀柒百餘

金詳明上憲歸入書院修膳各增有差予惟士氣需乎振作豪傑奮興難概中材以下而殊尤異敏終資涵育以成海蚌剖而明珠始顯崑竹斷而鳳音始彰荆璞琢而寶光始現我

朝久道化成人文蔚起績學鴻儒培養深沉明道術而通政治窮經致用卓然軼羣自俗士薄植不務實勝文章經濟視爲兩岐惟戶誦墨牘家守房行以祈弋獲幸而見售遺笑大方不則皓首伊唔薄無一得名未可以幸成而學徒荒於不殖豈非教術未端滋之誤哉予承乏茲土忝有父師之責書院一役私心惓惓非直爲楊君善厥後惟願此邦人士養其根而蒞其實樂羣敬業相與有成也至若藏修之暇游息皆學望大河之來自天上汪洋無際則恍然於學有本原功深而效遠也溯涇渭之合流清濁迭變則潏然於美質難恃

而習與性成遊必擇士也瞻大華之攢峰如蓮出於泥亭亭
雲素則可悟學之秀中彪外篤寔而輝光也鐵鏃山東遠西
折壁立千仞始仰程編修之奇抱高侍御之介節也遊覽登
眺皆足以疏瀹精神發揚性情又豈徒呻吟咕嗶乞靈糟粕
已哉抑書院錫名華原山峙其北故也諸生業精於勤文章
報國卽謂清華之品由此其選亦無不可予向爲諸生肄業
晉陽書院八年日月切磨學業寸進概由乎此若謂長官以
此爲報最之資多士以此爲市名之地則非鄙懷所敢知已
西安行署在儒學西北久廢

學校

文廟元知縣成好德洪武初縣丞卞禮先後增葺然厥址湫隘
成化初知縣郭良稍拓知縣劉禮又增修之後七年知縣鞠鏞

又修學憲伍公福爲之立碑自是嗣者十三年李英十九年口
道立相繼增葺嘉靖乙卯地震大圯戊午縣丞口淑嘉收遺材
表豎鹵莽卑陋辛酉又遭回祿乙丑復興工重葺於是始拾本
朝雍正四年知縣楊臚賜乾隆二十二年知縣成邦彥又修

修建文廟學宮記夫子之道在萬世夫子之廟貌遍天下而
學宮者沐聖人之教澤以養育人材者也我 國家振興文
教百餘年來培養深醇士多爭自濯磨以求不負所學而官
師之責爲尤重蓋官師有賢否而學校之興廢因之學校有
興廢而人材之成敗由之矣朝邑文廟自邑侯楊公修建後
三十餘年破損殊多而學宮自明季以來荒涼特甚則所以
修飾而整頓之者誠不容已也 今上龍飛之十八年中衛
劉先生秉鐸茲土見此氣象急於修整請於邑侯成公公曰

惟先生其實圖之因謀於紳士紳士咸欣欣然樂於從事也
事定邑侯高公至又歡然樂成厥事而典廳薛公與爲贊勳
以及督工生員李篤生上官汝欽上官德輅段雲錦監生白
永成饒永昇焦復遂蘇玉麟鄉耆雷起祥吏員王進忠同心
協力夫而後敝者修之如大殿兩廡崇聖宮明倫堂敬一亭
泮池內外學宮門牆靡有弗新也無者建之如省牲所講堂
射圃書辦門十房在在悉滿焉工始於乾隆十九年二月落
成於二十一年三月三閱年而始就甚矣成功若斯之難也
夫 國家所重於學校之地亟亟然惟恐官師弗以爲重而
墜之致匹夫匹婦放逸失教也乃於所設置非惟不知修飾
其視其弟子不啻秦越人無所及也先生獨於 國家亟亟
於是焉者以亟亟然興起而涵漬之使英雄俊偉之士班班

然由是生也其敦詩說禮孝弟睦讓悠悠然由是益厚也余
待罪儀隴家弟姪來歷歷言之不爽而邑之薦紳先生附書
囑余作文以記之余故述所以成其事者而深幸吾道之賴
有人也尤望吾鄉之都人士體賢侯與先生作成之意共鼓
舞而振興之使夫聖道光昌人材蔚起所補不誠大哉乾隆
二十一年儀隴縣知縣邑人趙蒲撰

補立楊公重修文廟碑記歲在壬申乾隆之十七年也余除
夕到任次日正朔恭謁至聖先師廟見其宏敞壯麗肅然生
敬因問修建之由於弟子員咸曰此皆前任邑侯楊公之力
也公自雍正三年春到任見廟廡湫隘囂塵不可以妥神靈
不足以聳觀瞻爰進紳士而語之力爲振興身先捐俸三百
金於是衆皆感動興起勃然捐助莫遏也而公務稍暇卽至

廟指畫綜理自朝至暮寢食不計凡大殿兩廡戟門櫺星門以及泮池照壁柵門無不一一齊整又建立奎文閣書院計費四千餘金計時六十餘日而後功成其曰楊公之功如此惜乎功甫告竣一旦讀禮而去也設不去則學宮亦且漸次修整不至如今日荒涼之甚矣言及與衆皆感激泣下恨未立碑致公之苦心厚力不白於後世也噫楊公之勤政愛民余未見者姑勿論卽此亦可謂有功於聖教矣夫自公至今三十餘年時雖久而口碑猶存更歷年所故老猶有存焉者乎安知不埋沒於荒烟蔓草中也今又重起修建喜功之已成立碑記事而生監上官汝欽白永成等向余懇請作文爲楊公補立碑記以傳永久余曰是矣但功不自成有主之者必有輔之者其間何人督工何人飲助尋覓簿籍無有存者

姓名不可復識矣其奈之何諸生曰不有主者誰其輔之無者闕之可也請誌楊公之功於不朽余遂據所述者筆之簡端勒諸貞珉云夫聖道之明於天下學校之力也學校之興於一方官師之責也楊公尊師重道以大其功諸生感功銘德以紀其盛均得之矣學者能實體聖賢之學因廟以生敬因敬以立身庶乎仰正學之宗得楊公之意而先後同揆毋徒作傳名空文已也公諱臚賜字華殿雲南石屏州人辛丑進士由翰林院庶吉改授朝邑縣令奉牌奎文閣中八月日紳士供香火致祭焉是爲記乾隆二十一年儒學教諭中衛劉得炯撰

大成殿五間舊爲至聖殿雍正四年改東西廡各十三間大成門舊爲戟門雍正四年改太和元氣坊在大城門內雍正四年

增建金聲玉振二門在大成兩掖雍正四年增建櫺星門三間
泮池在櫺星門外明萬曆間知縣郭實創開 國朝順治十年
知縣王承庚從形家言謂納汀弗吉改門內康熙二十一年知
縣陳昌言以狹隘仍改門外制頗濶大南緣城起磴道立螭頭
雙表曰雲路象丹梯云德配天地道冠古今二坊列東西衢舊
依宮牆僅橫板額無以聳觀康熙五十年知縣王兆燾建啟聖
祠三間在殿東北名宦祠在大成門東首今名宦祠內又有葉
映樞羅人源姚士塾三人鄉賢祠在大成門西首今鄉賢祠內
又有雷于霖李楷王建常張好奇四人尊經閣向在宮牆外東
西通衢雍正四年知縣楊臚賜以地隣雜沓移建學宮翼方榜
曰奎文閣乾隆四十二年知縣吳忠誥仍改爲尊經閣其舊閣
已廢

記曰 聖天子尊師重道加意作人今天下自京都下及郡
縣邑皆立至聖先師孔子廟廟必立尊經閣以爲藏經之所
蓋尊經正所以尊師意至深也朝邑舊有閣在明倫堂之北
前司牧楊公以地溷市塵移置廟之東南異地而肖奎星像
於其上顏曰奎文且以舊閣地址建廡舍數間以爲奎文報
賽之資而尊經之意於以久缺矣茲者邑侯吳諱忠誥字登
書以選拔來宰是邦政務休暇時畱心補缺興廢培植風化
旋以創建河神八蜡祠餘銀重整修聖廟興復是閣移置神
像於其南以上應文明仍顏其閣曰尊經而數十年久曠之
典不勞而興矣已復念西河書院師儒雖設而脩脯衰薄無
以獎勵後來卽以廡舍賃資一十一兩餘移歸書院著管事
人經營生息以作將來買地膏火之本一時言語懇切照人

肝膽昔人云一舉而三善備其在斯歟他日者文材掘起文章聿興我侯之功寧不偉哉瀨等身沐膏露敬荷陶成竊恐後之承流者莫識其源也是爲記乾隆四十二年歲次丁酉春三月立癸酉拔貢生雷長瀨撰

明倫堂五間在大成殿后康熙四十八年知縣王兆鰲重修雍正四年知縣楊臚賜擴其基繚以垣雍正□□年知縣馮盡善重修博文約禮二齋射圃觀德亭俱廢敬一亭今移建明倫堂之左

儒學在文廟西大門三間西向教諭署在儒學門內訓導署在教諭署西俱南向

學田共五十八畝有奇歲徵租三十五石分給廩生貧士詳見學宮碑

西河書院在學宮旁舊爲社學康熙十八年知縣朱集義捐設義學雍正九年知縣楊臚賜增建堂宇改爲書院延師課學以西河爲卜子設教之地故名後知縣丁士之吳忠誥先後勸捐置地取租以供山長修膳有碑記

庶常楊侯出尹朝邑六年於茲矣本經術以布治道定河界辦軍需不擾不忒吏民懷之於是次第修舉廢墜復鼎新廟學其規制一準夫闕里堂皇巍煥大體斯崇甚足以振士氣而宏教澤也而又於學左立西河書院專祠卜子集朝人士之有志有行者課業其中歲辛亥以落成來告誌館書旣書之於策以傳永久而猶慮紹述之無人則假爲廩困廩監不數年而摧爲薪鞠爲草者其恒耳乃進朝人士告之曰夫日之麗天也赫赫明明靡所不照而日與列星借日之光以爲

光亦足以使晦者常顯而晝夜不息夫子之道如日中天而四聖十哲得夫子之道以爲道其大者如月其次如五緯又其次如二十八舍皆足以光照千古而不墜彼七十子之徒自四方來學於洙泗歸則各以其所得淑其郡國之士秦人有三焉曰壤駟子赤燕子汲秦子祖其所得於夫子之道以淑秦士者史策失傳而秦人至今猶依其姓名以致其仰止之懷若魏之少梁夏陽臨晉北澂皆與秦封密邇衛人卜子自魯歸設教西河經學昌明吾道之西千百世下有不溯卜子之澤而深其景仰者哉歷代分域龍門以西渭汭以北凡西河地悉隸秦疆則朝固關西閩閩也當日卜子以篤信謹守之詣而衍爲溫柔敦厚之教其所得力與誘導者莫不與天下後世共白之其對夫子論詩嘗曰昭乎若日月之明燎

乎若星辰之爛學者苟能尊聞行知其始如燦爛火以希一隙之光漸且秉炬而朗徹久之有不共仰懸象之著明者歟夫列宿之繫於天也其光燭天下而不限於地然謂太白不主金氣鶉首非秦分星有是理乎侯之祀卜子以教朝人始欲先定其所守而漸進於風雅則根柢蟠固而枝葉暢茂闢學之盛豈可量哉朝人曰敬受教於是乎書之於石以示後之君子願相維持於勿替侯名臚賜雍正癸卯進士雲南之石屏州人糧鹽道沈青崖撰

我 國家養士百有餘年文教覃敷凡遐陬僻壤家弦戶誦矧茲朝邑跨三河而瞻二華鍾靈毓異代有英賢又卽爲向者卜子夏設教之地歟攷唐開元時天下州縣里旣各置學又置麗正書院聚文學之士撰義講有司復給之自是至於

元凡先儒之所過化名賢之所經行並立書院置山長出錢粟以贍學者吾疑西河之上必且久有書院之設也而志乘獨不傳夫玉生於山不遇卞和則識之者難也珠沉於淵不遇象罔則索之者難也士修於家不遇良有司則激發而興起之者無人也當其株守蓬巷文章經濟引爲已任一行作吏此事遂廢往往而然尚安望其興賢育才相與以有成耶邑之有西河書院也 本朝遼東朱君卜地於學之西爲社學厥後滇南楊君擴其基而更以今名 皇上龍飛之二十有三年浙西丁君首捐俸爲邑紳士倡置地若干頃以給生徒膏火蓋自卜子設教西河遲之數千百年而後創有書院又歷三君子而後規模始略備其難如此雖然毋徒以其名也古者八歲入小學知室家長幼灑掃應對之節見小節焉

踐小義焉二十而冠入大學學先聖之禮樂知朝廷君臣上下之等修六德六藝之凡見大節焉踐大義焉是以治化隆而人材盛也茲幸際 昌期寸長一藝皆得有以自見而或狃於故習以專精舉業爲通人以弋獲科名爲得志儒者羞之誠欲聚多士於書院之中以相教養則宜先端其所嚮而後漸有以和平其血氣閑淑其見聞俾務爲明體達用之學而不尚空虛無實之詞如是以處則德行薰鄉閭如是以出則功業輝廊廟於以步武先賢宣揚 至治豈不美哉當事者其勉之吾嘗誦詩至青青子衿識鄭之所以微也又嘗誦詩至思樂泮水識魯之所以興也丁君蒞任方一載而首先是舉則其爲政可知矣是宜記知府李星曜撰 聖人之道備於六經自刪述而後孔門七十子之徒並受其

義其得與斯道之傳各有淺深厚薄之不同而經傳則道傳
是以百家子史不得與經術同穆深之氣學必有本亦必得
其所宗而後德行文學體立用行聖人之道心源可接將繇
衍於無替也朝邑舊有社學雍正丁未余蒞任之次年迄今
壬子六載以來鼎新聖廟卽借公捐餘資重加修建中構堂
後起書屋東西並建配房臺門圍垣靜深宏敞將進諸生肄
業其中以課實學而儲人才延經明行修之士掌院事崇祀
卜夫子子夏題曰西河書院夫大河以西皆魏地孔子沒子
夏退居西河教授生徒魏文侯師事之咨以國政段干木田
子方皆出其門魏人疑爲孔子昔曾子嘗謂子夏曰吾與子
老於西河之上當日設教旣久其與諸弟子漸摩於道德者
旣公以溥而入人爲最深邑中諸生進而請曰郟陽夏陽川

瀕河有子夏石室韓城有西河村建祠奉祀又有卜家村卜
氏其苗裔也傳稱西河未知定處余曰大河以西是焉往而
非西河也先賢設教其杖履所遊歷何所不至生徒所親炙
何地無人何論乎兩河東西何分乎朝郟韓城也邑治去河
東數十里許古爲河西縣祀之又何疑焉大道常新千載茫
茫卽今考其里居本衛人而墓有二一在曹州西三十里卜
垆都一在河津縣西五里新豐村園林栖賢之墟且無定處
而必欲以繇延大川指一席之地以爲援據是將使三千之
徒皆羣萃於東山泗水間而七十二廷聖人轍環周流之地
所在請業者卽不得居杏壇弟子之列是何膠柱之論也乎
夫子夏傳經者也趙氏謂孟子長於詩書程子謂知易禮春
秋莫如孟子子夏習於詩能通其義著爲爾雅相傳毛詩序

皆其遺說明正始之道王化之基詩教賴其羽翼對孔子曰
詩之於事上有堯舜之道下有三王之義是典謨與義其歸
一揆長於書也持滿戒盈終身奉行長於易也五至三無而
通於無體之禮無聲之樂又傳禮在於志長於禮樂也榮先
王之義公羊高穀梁赤親受其學長於春秋也接千聖之心
傳精微一貫啟後承先卽經傳道流衍大澤不猶在華原三
水間乎余久居是邦知邑多君子宋元以前文獻無徵有明
一代人文倍出載在志乘筆不勝書其最著者程編修高侍
御韓司寇忠孝節烈氣壯河山而遺佚如王復齋研究性理
學登堂奧直與河津文清東西相印今與紳士周旋皆敦本
崇實尚氣節不務紛華砥學勵行不徒以帖括爲工卜夫子
之教澤源流自遠論者謂漢儒明經不明道余直以爲未嘗

明經耳學者於中誦法而景仰之追宗前哲萃薈六籍探其
本而咀其華折衷於一不爲旁雜得聖人之道法之所由傳
則經學昌明大道之統淵源可繼是則聖人之徒是余之志
也夫余今以讀禮去振興教化丕煥斯文尚俟後之君子知
縣楊臚賜撰

西河書院與華原書院共田二頃八十餘畝取租銀一百一十
餘兩又紳士捐輸交商生息銀一千七百三兩九錢一分八釐
社學四所 兩女鎮一 舊大慶關一 安仁鎮一係新設
郝家莊一雍正十年知縣楊臚賜建設

歲科試額設入學十六名

額設廩膳生員二十名

額設增廣生員二十名

倉廩

常平倉三處一在縣署大門內東偏康熙五十年知縣王兆鰲增修廩房八座計二十五間一南新倉在縣城南街廩房八座計三十七間相傳察院行署改建歷年久遠無可考一西建倉在縣城西街廩房七座計三十五間係乾隆五年知縣王爾藩建造

社倉一十一處 在城一 新關社一 舊關社一 辛市社

一 趙渡社一 韋林社一 伯士社一 安仁社一 雙泉

社一 兩女社一 北千社一

武備

兵署在東門內

演武廳舊在南門外今移城北

朝邑志卷七

在城駐防經制外委千總一員

楊王謨潼關人武生

馮元潼關人行伍

孫宗夏江南人武舉

張天培潼關人廕襲

李正才潼關人行伍

賈秉義潼關人行伍

馬步守兵二十五名分撥趙渡鎮步戰兵二名守兵三名 兩

女鎮馬戰兵一名步戰兵一名守兵二名焦家莊兵四名 大

慶關守兵二名 餘俱存城

分防王家莊汛千總一員康熙五十四年新設

額賦鄜州人行伍

李懋功靖遠縣人行伍

錢壅慶陽府人行伍

彭有年固原州八行伍

馬顯固原州人行伍

李文成西安府人行伍

路麟固原州人行伍

楊錦鳳翔縣人武生

阿新泰滿洲人護軍

薛榮宗長安縣人武舉

曹祿寧羌州人行伍

馬步守兵二十八名俱在營並無分駐塘口